

दिनांक 11.06.2025

समय: 18.45 बजे

- प्रधानमंत्री नरेन्द्र मोदी कल्याण केन्द्रित विकास रा प्रति सरकार री अटूट प्रतिबद्धता जताई।
- केन्द्रीय मंत्रिमंडल रेल मंत्रालय री छह हजार चार सौ करोड़ रुपया ऊं बत्ता खर्च वाळी दो परियोजनावां ने मंजूरी दीनी।
- जल संसाधन मंत्री सुरेश सिंह रावत दौसा, करौली अर धौलपुर जिलां री पाणी री न्यारी-न्यारी परियोजनावां ऊं जुड़्या पूरा व्ह्या काम जनता ने सूप्या अर नुवा कामां री नींव रखी।
- राज्य मांय जबरदस्त गर्मी अर लू रा हालात -उतराद अर आतूणी हलकां मांय पारो 1 ऊं 2 डिग्री सेल्सियस ताई चढ़बा रा आसार।

000

केन्द्र मांय प्रधानमंत्री नरेन्द्र मोदी री अगुवाई वाळी एनडीए सरकार रा ग्यारह साल पूरा व्हेवण रा सिलसिला मांय भारतीय जनता पार्टी री ओर ऊं न्यारा-न्यारा कार्यक्रम राख्या जा रह्या है। प्रदेश मांय ई केई मंत्री प्रेस कॉन्फ्रेंस कर र केन्द्र सरकार री उपलब्धियां री जाणकारी दे रह्या है। आज जोधपुर मांय केन्द्रीय मंत्री गजेन्द्र सिंह शेखावत अर उपमुख्यमंत्री डॉ. प्रेमचंद बैरवा खबरनवीसां सागे बातचीत कीनी। श्री शेखावत कह्यो के प्रदेश रा किसान ई प्रधानमंत्री कृषि सिंचाई योजना रो फायदो उठा रह्या है। केन्द्रीय मंत्री भूपेन्द्र यादव अलवर मांय प्रेस वार्ता कर र केन्द्र सरकार री योजनावां री जाणकारी दीनी। वे कह्यो के केन्द्र सरकार संकल्प से सिद्धी रो लक्ष्य हासिल कीनो है। लारला 11 साल मांय देश रा हर तबका रा लोगां री जिन्दगी मांय सुधार आयो है। भाजपा रा प्रदेश प्रभारी डॉ. राधा मोहनदास अग्रवाल कोटा मांय कह्यो के मोदी सरकार कानी ऊं चलायी जा रही जनता रा भला री योजनावां अर नीतियां रे कारण देश मांय करीब 17 करोड़ लोग गरीबी री लकीर ऊं ऊंचा उठ्या है।

.....

ऊर्जा मंत्री हीरालाल नागर पाली मांय संकल्प से सिद्धि तक मुद्दा माथे राख्यी ज्यी कार्यशाला मांय शिरकत कीनी। ई दौरान सरकार कानी ऊं चलायी जा रही जनता रा भला री योजनावां री प्रदर्शनी भी ई लगायी ज्यी। उद्योग अर वाणिज्य मंत्री कर्नल राज्यवर्द्धन राठौड़ बीकानेर अर केन्द्रीय मंत्री भूपेन्द्र यादव अलवर मांय प्रेस वार्ता कर र केन्द्र सरकार री न्यारी-न्यारी योजनावां री जाणकारी दीनी।

000

केन्द्रीय मंत्रिमंडल रेल मंत्रालय री छह हजार चार सौ करोड़ रुपया ऊं बत्ता खर्च वाळी दो परियोजनावां ने मंजूरी दे दीनी है। आं मांय कोडरमा-बरकाकाना अर बेल्लारी-चिकजाजुर रेल लाईन ने दोवड़ी करण रा काम शामिल है। सूचना अर प्रसारण मंत्री अश्विनी वैष्णव आज नई दिल्ली मांय केन्द्रीय मंत्रिमंडल री मीटिंग पाछे खबरनवीसां ने आ जाणकारी दीनी। वे बतायो के 133 किलोमीटर लम्बी कोडरमा-बरकाकाना लेण ने दोवड़ी बणावण ऊं 938 गांवां रा 15 लाख ऊं बत्ता लोगां ने फायदो व्हेला। श्री वैष्णव बतायो के परियोजना रो ओ हिस्सो झारखंड मांय कोयलो निकाळबा री खानां रा एक खास हलका ऊं व्हेतो निकळेला।

.....

झारखंड, कर्नाटक अर आंध्रप्रदेश रा सात जिलां मांय अ दो परियोजनावां रेलवे रा मौजूदा नेटवर्क ने करीब 318 किलोमीटर और बधावेला।

000

बूंदी जिला रा कछालिया गांव मांय स्टोन पार्क बणायो जावेला। मुख्यमंत्री भजनलाल शर्मा ई सारू रीको ने करीब 47 हैक्टेयर जमीं आवंटित करण री मंजूरी दे दीनी है। ई साल रा बजट मांय ऐलाण करी ज्यो ओ स्टोन पार्क बणबा ऊं ई हलका मांय औद्योगिक विकास ने बधावो मिलेला अर नौजवानां ने नौकरी-धंधा रा मौका मिलेला। मुख्यमंत्री राम जल सेतु लिंक परियोजना सारू वन विभाग ने बारां जिला री छबड़ा तहसील मांय करीब 35 हैक्टेयर जमीं आवंटन री ई मंजूरी दे दीनी। मुख्यमंत्री रामगढ़ अर महलपुर बैराज अर नवनेरा-गलवा-बीसलपुर-ईसरदा लिंक परियोजना

रा तैत बैराज बणावण रे कारण वन भूमि रा हर्जाना सारू वन विभाग ने जमीं आवंटन रा प्रस्ताव ने मंजूदी दे दीनी।

000

जल संसाधन मंत्री सुरेश सिंह रावत आज दौसा, करौली अर धौलपुर मांय पाणी ऊं जुड़ी न्यारी-न्यारी परियोजनावां रा काम री नींव रखी अर पूरा व्ह्या काम जनता ने संप्यो। श्री रावत लालसोट मांय मोरेल नदी माथे बणायी ज्यो समेल एनिकट जनता ने संप्यो। वे करौली मांय पांचना बंधा ऊं जुड़्या पुनर्वास अर सुधार रा कामां समेत एनिकट बणावण रा दूजा कामां री नींव रखी। 'वंदे गंगा' जल संरक्षण-जन अभियान रा तैत सरू करी ज्यी आं परियोजनावां ऊं काश्तकारां अर जनता ने ज़रूरी तादाद मांय पाणी मिल सकेला। ई मौके श्री रावत जनता ऊं बिरखा रो पाणी भेळो करण री अपील कीनी।

000

प्रदेश मांय आज जंगलात महकमा री ओर ऊं जंगली जिनावरां गिणती करी जा रही है। वॉटर होल तरीका ऊं करी जा रही आ गिणती आज संवारे आठ बज्यां सरू व्ही, जो काल संवारे आठ बज्यां ताई चालेला। जिनावरां री गिणती वां री प्राकृतिक जल स्त्रोतां कने आवण-जावण रा आधार ऊं करी जा रही है। जयपुर प्रादेशिक रेंज रा झालाना, आमागढ़ लेपर्ड रिजर्व अर झालाना जंगलात हलका मांय करीब 53 वॉटर प्वाइंट्स परां आ गिणती करी जा रही है। झुंझुनूं ज़िला रा नौ जंगलात हलकां मांय 40 ठोड़ां जंगली जिनावरां री गिणती करी जा रही है। कोटपूतली-बहरोड़ मांय ई सारू 11 प्वाइंट्स बणायी ज्यो है। वन अधिकारी सतपाल ढिलन बतायो के हर एक प्वाइंट माथे दो-दो वनकर्मी तैनात करी ज्यो है।

000

21 जून ने मनाया जावण वाळा अन्तर्राष्ट्रीय योग दिवस रा सिलसिला मांय आज आकाशवाणी केन्द्र नई दिल्ली मांय "कार्यस्थल पर योग" कार्यशाला राख्यी ज्यी। कार्यशाला ने जयपुर रा राष्ट्रीय आयुर्वेद संस्थान रा योग विभाग रा सहायक प्रोफेसर डॉ. पुनीत चतुर्वेदी ई संबोधित कीना। ई दौरान न्यारा-न्यारा कार्य-अनुकूल योग अभ्यास रा बारा मांय जाणकारी दीरीजी। डॉ. चतुर्वेदी बतायो के योग अभ्यास, योग दर्शन री भांत ई खास है। वे कह्यो के योग रो और कोई विकल्प नी है। कार्यक्रम मांय आकाशवाणी री महानिदेशक डॉ. प्रज्ञा पालीवाल गौड़ अर अतिरिक्त महानिदेशक एल. मधु नाग ई शिरकत कीनी। प्रदेश मांय ई अंतर्राष्ट्रीय योग दिवस ऊं जुड़्या न्यारा-न्यारा कार्यक्रमों रे जरिए लोगों ने योग अपनावण री प्रेरणा दी जा रही है। आज पाली रा मिल हलका री सरकारी सीनियर सैकण्ड्री स्कूल मांय योग रा न्यारा-न्यारा रूपां री सिखावण दीरीजी। अंतर्राष्ट्रीय योग दिवस रा सिलसिला मांय आकाशवाणी जयपुर रा क्षेत्रीय समाचार एकांश री ओर ऊं संदेश श्रृंखला चलायी जा रही है। इण मांय आज पेश है जयपुर री योग प्रशिक्षक अनामिका कोठारी रा विचार। वां रो कहवणो है केयोग करण ऊं शारीरिक अर मानसिक स्वास्थ्य बेहतर बणे है।

000

राज्य मांय ज़बरदस्त गर्मी अर लू रा हालात बण्योड़ा है, जिण ऊं घणखर ठोड़ां दिन री बगत पारो 44 ऊं 45 डिग्री सेल्सियस बीचे चाल रह्यो है। तेज़ गर्मी अर लू ऊं ज़िन्दगी माथे घणो असर पड़ रह्यो है। मौसम विभाग रे मुजब राज्य रा आतूणी अर उत्तराद हलकां मांय आवता 48 घंटां मांय पारो 1 ऊं 2 डिग्री सेल्सियस ताई और चढ़बा रा आसार है। बीकानेर संभाग रा श्रीगंगानगर अर हनुमानगढ़ मांय 13 जून ताई अधिकतम तापमान 47 ऊं 48 डिग्री सेल्सियस बीचे रेहवण री संभावना है। जोधपुर, जयपुर, भरतपुर अर कोटा संभाग मांय ई आवता तीन दिन अधिकतम तापमान 44 ऊं 47 डिग्री सेल्सियस बीचे रेहवण रा आसार है।

000